

欽  
定  
全  
唐  
文

欽定全唐文卷一百七十八目錄

王勃二

乾元殿頌

并序

拜南郊頌

并序

九成宮頌

并序

欽定全唐文卷一百七十八

王勃二

乾元殿頌

并序

臣聞鵬霄上廓瓊都開紫帝之庭鼇紀下清珍野闢黃靈  
之館兼山配極照鸞闕於霞標薦水涵元湛驅宮於霧壑  
斯則神徵語怪功潛鳥跡之初理涉非經道昧鶉居之始  
授鳳書而稽碧落仙構罕存按龜錄而質黃圖金模間起  
粵若風移處闔層巢恢火運之機業洎嚮明上棟括河圖  
之奧三堦布政詠匪日於靈臺百堵陳詩頌斯于於考室

亦有黃軒瞰月譙門頽九洛之功璿闔排煙牧野構三河  
之酷御燕臺而臨北極缺王度於祈招列雲閣而拒南山  
隕皇謨於軹道然則卑宮喪禮采椽輕四海之尊豐屋延  
災柏梁非萬乘之有雖因時立事奢儉殊流而宏道在人  
興亾迭運靈光末造不窺九室之榮景福宏規猶擁三方  
之覺瞻風舊史逮曹馬而無譏觀跡故墟厯周隋而未得  
自我唐太陵遷構均五方於鶴几之前中野凝圖調六氣  
於虬牀之下坐圭臺而清俯仰晷緯齊明臨鼎邑而重威  
靈風雷合響得元功於大壯其在茲乎我大唐雞渾指極

樹神宰而制山河鶴識裁儀闢太虛而有天地黃精吐瑞  
潛龍苞象帝之基紫氣徵祥鳴鳳呈眞王之表高祖太武  
皇帝虹星湛色開寶胄於金壺蛟電凝陰發皇明於石紐  
白蛇宵斷行移海岳之符蒼兕晨驅坐遘雲雷之業屬東  
隣委馭扇虐政於叢祠北拱隳尊素皇圖於寶極蜚鴻集  
野瞻烏鮮投足之因青犢嘯風羣鹿無擇音之所天街五  
裂截鯨浦而飛芒地紐三分觸鼉山而按節元虬在御掃  
圻甸而廓星都黃鳥分麾動扶搖而駭雲陣鏹宮仗鉞跨  
高陌而登元轡野韜戈陟圯壇而擁號皇圖不恃聖人追

卷領之風神器無私才子奉褰裳之運太宗皇帝雲房揖  
契壓麟璽於庭軒雷渚翔英擾龍鈴於周鑄八能亨運抗  
鵷邸而仗朱髦十亂恢基臨鶴州而擁黃鉞唐雲祕族潛  
開白水之徵代景迴輪光踐丹邱之運權輿象緯削茅社  
而建瓊桃草昧風雲席蘿圖而創璿厯紫庭合粹括宇宙  
於宸襟丹宸凝尊運陶鈞於寶思摘碧霄而鍊石上清耀  
魄之宮詔寰海而捐珠俯睇陽侯之室功驅偃伯頓鶚視  
於華封道被來王靜龍吟於武庫元樞上運卜年開累聖  
之符丹竈昇遐遺範敞謀孫之畫皇帝陛下椒庭襲慶曜

璿萼於霞莊蘭殿分休湛珠衡於月館道凝瓊鎮下蒼掖  
而照重熙業峻銅樓憑紫軒而揖羣后環四瀛於舜抱漏  
蟻覃津棲十景於堯衿巢螟荷照上元開錄寶龜定皇邑  
之模下武崇基飛龍錫帝臺之構貞明啟運齊玉鏡於鸞  
門易簡成功偃銅符於鶴仗懷降尊於襄野太階忘七起  
之勞念負重於焦原中席託三危之險臨翠嫵而則道天  
孕時成坐元扈而被圖神超物妙皇后星潏縱淑曳珠紱  
於銅皋雲野疏祥抗瓊枝於桂浦素蟾登慶六虛充牝馬  
之貞丹雀銜休三雅合關雎之好璿宮夜靜居龍幃而調

元金屋晨開御駕階而緝化芝庭揖訓遠清和鳳之儀蘭  
佩承風競峻當熊之節皇太子承雲紫座翊八柱於乾維  
湛粹青衢揖三樞於地戶黃離踵曜太陽分銑樹之輝蒼  
震薦音少海控銀河之色鶴筌飛奏想丹駕於瓊山鮑俎  
捐芳齒元冠於寶序彤闌問豎禮崇監撫之威黼席興賢  
義極君親之愛若乃東門卹允疊仙構於熊山西苑承家  
導靈波於鴈沼桐珪作瑞鳳毛曜丹穴之英茅壤分維麟  
距冠元邱之俊吳宮延粹闢朱柱於娥臺兌野流芬疏紫  
蘭於別館頻隈毓範雲扃分戚里之驩覃嶼凝規星閣絕



郎官之請雕龍命職縱跳澤而驤鱗翠鷁調司順義颺而  
撫翼月軒宵佇虞谿降璿緯之精震帳晨披姜水洞金韜  
之蹟飛鶴書而抽海狀桂壑於是投綸轉麟旆而揖山容  
松澗由其削衽軒圖瑞喬泛花綬於雞林農紀祥炎濯蘭  
纓於鳳水仙臺倣務三珪銓棘序之風天秩調邦六府燮  
槐衢之典金門獻納縱麟筆於苔牋石館論思敷龜章於  
竹塹淹中訪禮蹲龍搖壁水之波稷下談經飛兔躍環林  
之秀詞庭吐鳳翫鳥跡於春蠶書帳翻螢閱蟲文於夏閣  
杏花千畝紺轅照磨蜃之功桑柘三宮元紱降親蠶之禮

圓邱上闢奉蒼壁於靈壇方澤下凝列黃琮於寶壇朱紘  
翠瓚履霜懷四饗之尊復雷重檐涓日正三綱之首五靈  
奔慶冠虵澤於黃樞六祀銜欣颺麟烟於紺席遺弓積慕  
虔深太廟之儀執豆推恩道振明堂之禮瑤山廣樂備逸  
調於宮懸洞庭仙奏納遺歌於帝府九韶分唱后夔清桂  
序之音六變同和飛鳳掌梧軒之律樽俎折旋之數苞舉  
陰陽堂庭節奏之規彌綸宇宙靈襟索隱控風伯於詞林  
睿想鈎深詔天吳於筆海神窮獨照傍探赤水之珍思洽  
幾深迴寫丹谿之韻金壇紫露映銀籀而翻華瑤林白雪

藻瓊章而吐絢蟬機撮化銅渾將九聖齊懸虬箭司更銀  
漏與三辰合運爽鳩分職素雲頽馬喙之祥神獬闕司元  
水照龍顏之則黃沙鞠草剗叢棘而遷訛丹石滋苔仰甘  
棠而息訟融皋再稔方聞外戶之謠昧谷千箱坐溢康衢  
之奏百城煙峙望秋露而乘風千室雲開合宵霆而組化  
彤幃獨選熊輻下蘆鴈之祥墨綬分賢犀檢降槐鸞之祉  
筠驂佇信髦士剖竹而相尋葦杖霑仁鮒叟攀輪而不暇  
龍蛇可踐野人豐荷杖之驩雞犬相聞城尉輟鳴桴之響  
五雲抽潤湛芳氣於璿臺六府咸殷唱豐歌於銅闕不戒

而畀東戶恩周動植之津博施而舉南風化偃胎萌之寓  
神謀備預嚴七萃於丹樞邃畧防微肅千廬於紫衛元戎  
握節黃公授犀闕之圖帝座聞輦元女薦龍庭之策蘋柯  
掉刃中權決勝於兩階白羽俄麾善陣推亾於四表朱匡  
反景之域削蛇弭於文槐黑山明月之鄉委龍琛於武帳  
錦軒星驚控乾絡而觀風繡服霞驚浹坤紘而問俗川浮  
沒羽鯨谿靜丹浦之虞陸薦飛毛熊巘動青雲之偵銀關  
驟雨望紫陌而趨恩鐵幌馳風計彤闈而漉思赤馬文猿  
之寶叢積乎郊虞紈牛露犬之貢滿盈乎儲邸青邱畫野

不踰征賦之鄉蒼水奉圖未盡隄封之貫且夫緯武經文  
宏業也含幽育明至誠也混齊六合大功也規模百代昌  
數也故能襲九空而寧庶物劃千里而統諸侯休徵象德  
而動嘉符觸類而至風揚晷洽藻乾慶於芳年司節河清  
藹坤禎於明渚瑶枝結慶泉埃蕩玉蓋之文瓊液浮甘天  
酒綴金莖之色黃麴紫脫湊仙穎於中畿翠筵丹莫疊靈  
株於上序駢眸候日漾影蒙池比翰翻風棲光理木祥飛  
井絡震鱗題瑞朔之元祉絢新郊枵獸紀和年之序具靈  
篇之絕貺究仙牒之殊休天人之際交矣皇帝之道備矣

由是三靈物覩扣蘭禁而棲誠九服子來詠蒿宮而騁力  
去奢去甚不矜黃屋之隆匪樸匪雕方順丹墀之請宸規  
相宅考周舊於靈都睿覽思和獲秦餘於正殿羣臣列陛  
奏蕭相之遺模天子臨軒採荀卿之故事炎洲八桂籛仙  
拱於林衡岱畎五松委靈材於梓匠衢宮記範萬機抗九  
戶之尊海孽移琛千樂省十家之費飛廉卷靄徹煙極而  
浮薨屏翳收津劃星墟而置槩瑤階百雉光懸寶露之壇  
瓊壁萬尋影綽崇霞之閣拖虹梁而四注星漢虧於上榮  
疊雲棟而三休寒暑隔於中雷雕楹鶴企沓勢分規繡栢

虬奔殊形別起圖璫布藻罄羽壁於狼泉方鏡披蓮孕花  
機於蜃浦芝樓對幄薰傳五日之風芸閣列錢彩鍛三旬  
之霧文疏罩迴陰兔息肩於綺寮翠幌籠霄陽烏鍛翼於  
珠網豐隆按節下複櫺而司階列缺施鞭低叢楹而假道  
溫房佇幸煦芳景於佳辰涼室乘閒凜徂颺於火序金鋪  
夕照若帝圃之耀瓊英寶綴晨懸類阿房之聚銀燭烟邱  
碧桂翊珉陛而披香雨岫赭筠夾璿流而颺影九衢翻翠  
雜仙卉於中逵四照霏紅間靈葩於右城神禽率舞光浮  
肆夏之軒瑞鳥相鳴響叶鈞天之樂鈎陳宿列儼雙碣於

丹霄綺微霞周闢千門於紫露爾其左局嵩鎮申侯降太  
室之禎前枕莘郊伊尹發空桑之秀揭熊山而北眺貝闕  
猶存覩龜溜而西分瓊臺易接總交中宇廓川陸而疏畿  
竟想善鄰揆風霜而建野然則因秦構極祖宗耀金策之  
符作洛恢基我后創璿居之始援天引聖隔代重暉橫紫  
都而可襲配元宮而非遠故能使神光夜燭鏡麟趾於文  
除仙滄晨華委鸞章於繡礎靈爻密發八方昭大有之和  
寶篆潛開六合啟同人之會兩儀交慶虛碧墀而翹旌萬  
宇披歡指蒼車而候蹕雖青蒲頌德東朝獻龍鳳之圖而



丹極鳴謙南面動貂羊之詔百神推策望璆徑而虔誠三  
讓奉符顧瑤壇而肅事龜書吐瑞按五校而分營鳳策揚  
輝翔八鸞而節步帷宮霧轉列芝蓋於中天帳殿星離軻  
蒲輪於大野紫鱗充饋若大帝之共臨素鶴翔華類羣仙  
之廣宴花開瑞雪委瓊饌而調芳綵絢祥雲夾珠旗而曳  
影功推三祖銀繩勒東岱之威業峻一人金筴奉南山之  
壽道旣成矣元符集矣代旣貞矣元勲緝矣運三辰而虛  
玉柄風兌渙其中孚懸五禮而偃金科雷坎光其作解奔  
烽舉爵溢仙酒於中衢疊鼓分餽浹宸輝於下里吞九皇

而上運控八聖而遐征翔赤驥而睇風區吟翠虬而掩霄  
甸隱隱轟轟雷動天驚回輿斜盼而降乎乾元之殿司宮  
庀職肅坻堦而神行掌舍巡方煥巖廊而洞啟赫若朱螭  
負漢而輝橫海之鱗默若蒼鵬架壑而振垂天之翮千官  
曉次僭銀榜而端簪萬戶宵披候瓊膏而肅帶靈戈列陛  
天官具三揖之儀雲輅充庭宗伯演九賓之禮瑤鯨戒響  
懸猛簣於端闈銅狄分形肅嚴扃於左序排紫微而立極  
宸儀冠明后之三俯黃道而披軒仙厯用乾元之九蕩蕩  
乎何聖人之無外巍巍乎而神功之不窮也臣勃席芳十

步企景三冬雖承宣室之談猶窘靈臺之影仙壇遠祕已  
多謝於祥鷄大厦初成復攀榮於賀雀慨深梁甫終乖捧  
日之歡恩極甘泉未動凌雲之價神圖不測固流綯於丹  
滕微志可存庶鐫芳於翠琬敢獻頌曰

紫局垂耀黃樞鎮野銀樹霜披珠臺月寫嚮明立極橫神  
廓社大壯擣爻斯千韻雅其一鷄居化沒狙訛道長瓊構霞

明璜軒露廠棄人崇欲違天蠹象南巢不救東鄰長往其二

瑤緘考懿金板藏功道凝茅屋業盛蒿宮龍階察祲鵠閭

調風推訪華禮酌儉思冲其三懸聚結覺傅翼生災于薨嶺

接萬拱星開爭圖絢侈福極凶來風寒碣館露慘蘇臺

其四

十館營秦金房砥室千間架漢韜雲閱日濟惡承危同亾

異術傾軋未遠遺墟繼出

其五

龍川結禍鶴塞稱符塵驚八

際霧慘三都穹廬寶極屬幕璿樞司宮墜典掌舍淪圖

其六

蒼衢毓祉丹邱表聖鳳矯仙樞龍迴寶命道凝金冊功馳

玉鏡紫氣抽華黃輝疊映

其七

神稽鶴識迹播雞渾重光累

極翼子謀孫經天緯象就日提元鸞軒湛粹鳳几裁尊

其八

祥抽紫厯業昭彤管珍雀朝翻仙蟾夜滿丹墟獻跡青臺

墜卯椒閭儀風芝闥奉欵

其九

登三建緒明兩開儀龍譙霧

鬱鶴禁霞披波分璿渚景峻瑤枝黃扉曉列丹轂宵移其十

龜文獵彥麟旌收逸桂客攀榮松賓改律紫鵠開紀丹虬

聳秩縱壑搏颺登山捧日其十一功融棘序道備槐庭不仁

者遠惟道斯行煙搖墨綬電轉朱軒境懷春翟野散秋螟

其十二鄭竹分科燕棠輟諷銅機化極珠囊業洞禮貴丹虬

樂調朱鳳珠垆獻寶綿鄉委貢其十三龍闕靜柝鶴塞投弦

歌呈豹尾舞進鳶肩銅鏡月斤鐵輞星懸繩幽架險驛霧

馳煙其十四霧壇凝紫河宮湛碧翠筵翻颺丹萸候魄霜均

電散連珠契璧蘊蓋籠霏花衢墜液其十五年和政美化極

風調靈臺軫詠考室興謠循圖訪典去泰捐雕道存南面

讓屈東朝

其十六

望雲裁構籠霄建宇方鏡星離圖璫月聚

梓匠傾思林衡授矩畫拱棲煙文軒架雨

其十七

芝房疊翠

桂廡流丹霞張萬戶霧葺千欒重局駐燠洞牖棲寒神加

有敘貺入無端

其十八

帝圖臨御皇僚萃止電戟揮霜雲旌

拒晷紫宮可逼黃街易履鳳礎騰文麟庭抗禮

其十九

珠泥

暢績銀繩鬱契鶴嶺雲明龍壇景惠道超中古功推下濟

惟帝惟天惟天惟帝

其二十

拜南郊頌

并序

微臣上稽龍繇下閱龜謀觀天地之至道考皇上之大節  
武宣七德未嘗踰息亂之鄉文招大功未嘗出昇平之域  
竝能懸日月而高視駕雷雨而先鳴或皮幣而踐大階或  
干戈而躡乾步至於理定創禮功成作樂振長策以敘諸  
侯設靈機而制羣動猶虞階已泰不能息洞庭之誅夏載  
克寧不能罷會稽之戮故將體剛柔而立本法震曜而崇  
威一戎而寓縣平四罪而華夷服然後皇旗大輅詔殊號  
於圓邱電轉星迴奏元符於孝理天下黎人知四海之安  
樂寰中殊域奉三靈之康泰德兼祥風灑道與和氣游不

言而大實用貞無事而元功有立捨彼代也其誰與哉若夫應運而生繼天而作鼓動千載之下超騰百王之上遂能發軒庭之景曜躡隋運之頽風揖讓而取文明指麾而清函夏則我皇唐得之矣高祖以黃旗錫瑞靜雲火之橫氛太宗以赤羽登期補星辰之絕縷授瑤圖於新邑付璿厯於鈞臺人更三聖道昭千古於是俛臨睿極趨四荒於鳳闕之前端委廟堂調萬國於龍軒之下八鸞徐動頓湯文於後塵九駿長驅佇堯舜於中路邦家之具得矣易簡之業存矣猶有朱蒙戾俗違光蓬艾之間青徼遺毗假氣



陶鈞之內背熊山而構虐擁狼潭而稽誅竊瀛海之風波  
弄乾坤之綱紀漢圖西返惟收五都之名魏律東窮未出  
三韓之險姦謀蓄於有漸逆節成於不悔長蚊蚋之雷霆  
附豺狼之羽翼豈知夫至人無外撫天下以爲家真數有  
歸弔羣方而罪已三門遁甲黃公成不戰之師五壘神兵  
元女下先登之策肅牙璋而按律耀旄節而分麾降南宮  
之元老裂西營之毅卒良將首路偏戎竟野軸轡萬里旌  
旗四合金箱玉匱司空憑百勝之威鶚視龍趨將軍仗萬  
全之畧負鼇邱而峻壁據鼇壑而深溝一鼓而亭塞無塵

七縱而江山失險伐罪以明而不以衆懷遠人於絕境均  
惠化於殊鄰登若木以照臨折紅桃以延佇然後分州列  
鎮對明月以收營返旆旋戈部元雲而振旅望神都而獻  
捷仰靈社以書功辛亥謁於昭陵癸丑告於太廟時乘黑  
帝月旅元枵大唐有國之五十一年皇帝有天下之一十  
九載也元惡旣殄萬宇清矣元勲旣輯萬寶成矣以爲周  
郊上帝裁延肅慎之賓漢禮甘泉未拯朝鮮之亂想元功  
而反側奉先旨以遲迴思答上靈之心以洽庶黎之望爰  
考吉日遂淨行宮有司具典乘輿乃出撫元蚪戴翠鳳翥

鼓按節鯨鐘疏響千乘嶽動萬騎林迴星陳而天行雷震  
而霧合是時未登夫泰壇也迺齋帷宮宿帳殿華蓋移影  
鉤陳從蹕千營夕布亘蒼野而烟凝萬幕宵懸背黃闔而  
霧列旣而屏翳清曉飛廉警旦孫叔奉轡王良縱策雲藏  
星謚宇曠山明旌軒具照簫笳互凝陟名嶽以告成厯神  
邱而展事國容象物而動朝章視令而肅宸儀有晬虛徐  
大帝之庭列侍無譁髣髴華胥之國於是襲袞服戒俎豆  
端瑞班儼華旒樂懸六代禮備三古奠惟蒼璧藉用白茅  
鳴孤竹之簫管奏空桑之琴瑟感格以誠不以事動植咸

驪敬神以道不以華天人合應然後駐聲名於上邑反文  
物於仙宮因雷雨而作施法雲天而用饗風行電舉未寸  
景而浹九埏野抃途歌不崇朝而晏六合我之元極建矣  
我之能事異矣超帝宸而振足越皇衢以驥首不其休乎  
雖睿化無方比神圖而經唱而小臣不佞撫洪筆而當仁  
敢作頌曰

遼河巨浸碣石危峯城分元菟塞接黃龍憑遐作梗恃險  
忘恭人殘鬼哭主闡臣凶有晉不綱戎麾內逐帝隋失御  
皇輿外驚九縣塵征三靈霧黯長茲下慢逋我天戮五材

無隕千齡有聖武創元基文清寶命波恬四海明宣七政  
息眾以寧綏荒以令飛龍繼跡鳴鳳重光遂均夷夏迭用  
柔剛戈船泛月劍騎橫霜風驅海石電掃辰陽帝師無戰  
神兵有伐丞相陪麾司空仗鉞危雲旦起長星夜發萬壘  
爭屠千城自蹙功超薄伐義極兼該殊方底定善陣徐迴  
歸俘獻捷課績分材建侯清廟偃伯靈臺考事龜謨凝清  
鳳宸仰觀俯察享神作祀道則推天功非在已豐隆且出  
招搖夕指神壇嶽立齋館雲深鑾旗曉引葆吹晨吟山明  
野澈日降天臨鏘鏘盛服肅肅珪簪俎豆畢陳笙鏞間撫

玉觴分獻金鐔暢矩青帝鳴琴朱靈會舞上和下悅神歆  
福聚收驩巨野反旆靈躔恩周宇宙樂極宸垓德因時立  
頌以詞宣帝之功也臣何飾焉

九成宮頌

并序

臣聞在天垂曜璿宮列乾象之墟在地班形珠闕鎮坤靈  
之野洎夫三精輯運卽寥廓而爲宮九聖旋游遍洪荒而  
可宅則有瑤房玉室崑山分大帝之庭金屋銀臺滄海濯  
元元之宇豈非神明其道騁仙轡於無垠浩蕩其居示清  
都於不宰若夫扃牖六合奔走八神占日月而揆山川駕

陰陽而法天地非聖人其孰能與於此乎至若文開遁甲  
仇峯城蒼后之躔樂奏鈞天峒嶺駐黃軒之駕業融環堵  
下姑射而尋真道濟巖廊望衡山而展覲斯則三階遍下  
唯臨布政之宮六位時乘未覩巡方之館其後兩龍齊驚  
抗瓊闥而同嬉八駿高驤指瑤池而結興殷風不競砂邱  
雄別館之娛秦道無章雲閣絢殊庭之賞於是功虧大壯  
頌闕祈招豐屋同亾危輒繼及遂使來年候跡名山爲縱  
觀之場並海遵河沃野盡行宮之地皇天震怒於上蒼黎  
昨慟哭於下土其有斟酌千古文明一代蒿宮不陋茨山

可仰祈誠東岳唐帝復衢室之尊用饗西岐天子合鈞臺  
之運得其道也蓋有存焉國家梯霄架極罄域裁基纂高  
邱白雲之裔鬱函都紫氣之兆宸扉旣開一宇宙而來王  
聖籙潛躋貳乾坤而作帝高祖天旗夜立制黃馬而先驅  
太宗日馭晨飛驂綠螭而首出雖立極承祧之業進燭前  
文而重光累洽之符歸功下武陛下承靈太乙踵睿登三  
星虹沓祉電虬發慶丹書碧篆神符煥河洛之文玉斗珠  
衡天骨挺皇王之表用能捨桐珪而宣七鬯肅玉籍而揖  
宗桃寫靄九天騰景萬里御風雷七曜於上博臨之功顯



用山川六府而下輔相之宜得元宮密運敷造化於靈襟  
黃屋神凝創經綸於寶思鳳闈宵靜陰靈宣玉閭之華鶴  
禁朝趨離象峻銅樓之景川分帝子控鯢壑而疏源岳動  
天孫擁熊山而列鎮其化成也如彼其強幹也如此猶乃  
停旒正室儼續中軒玉階匪泰金門爲險停虹旃於月澗  
岳瀆生光飛鶴蓋於煙皋江湖動色桃溪逸彥塞丹井而  
歸風松磴遺英斬元關而奉制位兼河海九卿參巨濟之  
功道合星辰三事鬱經天之象朱轡緝化泣故老於中溪  
墨綬宣風繞春童於上陌王化之基已洽天工之代有序

建銅儀而測曜象緯齊懸按璿璣而書雲禎氛疊舉祥噉  
十二紫鸞調夏谷之音大禮三千頻虵應黃鍾之曲蠶功  
順令業著於青裳蜃磨迎春恩周於黛耜黃砂靜讞爽鳩  
興頓足之悲丹石銷冤神解輟摧鋒之計詠時和於帝壤  
動植咸驩歌道泰於華封昆蟲自樂星墟列將輝玉節而  
長驅天策神兵下金壇而決勝橫麾赤坂葱山成不戰之  
郊命繳青邱桃野見其亡之兆煙馳火徼勵珠產而移琛  
雪驚冰洲駕瑤谿而納賁乾坤徑復載遵赤縣之封曦望  
環周未出黃圖之域故夫含吐萬物至功也制乎八表大

業也一陰一陽神道也乃文乃武聖圖也用能使天不愛  
寶地不藏珍日月五行風雲四序龍章鳳彩舄奕於郊墟  
黃鉉紫玉磊砢於垆圉集靈風於翠簷浴甘露於朱英澤  
馬飛鑣山輿結轍殊徽狎至祥書竭東郭之毫累譯同歸  
朝冊盡南山之竹然後瑤壇備物陳帝服而展皇儀后室  
疇庸登太山而小天下功宏事畢狹廣宙而三遷風舉雲  
搖厯神都而一憩考遺基於汶上稽故典於淹中光總章  
之瑞紀嗣乾封之寶厯大矣哉昇中作睿握四海而爲尊  
則大斯模肇三官而配永憑太室而高視靈壇八百坐明

堂而恭已諸侯一萬時旣貞矣襄城辭訪道之遊功旣成  
矣元圃頓尋仙之駕由是南宮奏議和元禁而成章西土  
謳謌指皇輿而佇眷咸以珍臺靚穆陽靈開避暑之宮清  
序鈞調景福制追涼之殿然則高棟深宇威神之大節也  
順氣發生巡遊之大功也况乎石城金室偏興井鬼之區  
珠藪瑤池宛在秦豳之境應雷輶而出豫蒼帝其時面炎  
馭而思和朱明不遠雖塗吟野竹黎元忻望幸之符而屈  
已從人天子下勞謙之詔候離宮而從宴尚惕三危清近  
縣而移鑾猶詳再駕以爲三十六所帝劉非舜禹之心四

十二宮全趙異成康之厯詠荆臺而夕厲思蒲坂而晨凝  
方奉後天之期俯順觀風之請萬靈提祉三辰合慶姬文  
考筮容成奏日干旌鳳轉儼鏤象而星陳萬騎龍嘶伐靈  
鼉而曉徹靜帷宮於綠野肅帳殿於黃街奔橈槍而走陸  
梁陳浮靈而侯明月前驅電竦下列缺於騰鞭後乘雷驚  
起豐隆於驟轂瓊戈晝灑太陽疲轉日之鋒玉劍宵翻懸  
象暗衝星之氣天旋霧散岳運川迴林兵護野方神啟路  
黃麾紫蓋雜真氣而西浮雲動神行背封巒而右指吐霧  
馳風以臻夫九成宮禮也爾時峯橫地乳景戴天縻分閭

井而圖基蔭秦星而耀趾靈墟寶藏代興汧雍之間峻阜  
長岑疊鎮岐梁之域丹溪碧洞吐納虹霓灌柏叢篁騰遷  
雨露獲秦餘於故兆地擬林光訪周舊於遺風山連水滸  
前趨劍棧玉壘千尋傍望斗城金墉萬仞架陰邱而北走  
境瞰鄜祠分沓嶂而西馳塗交隴坂仙都密邇猶連上苑  
之局靈宮巋然直透崇岡之曲卽喬基於礪道利在斯干  
固拱木於虞衡規同匪日彌峯跨谷層城萬轉庇險乘危  
迴廊四注山祇盡石出微道而終年風伯羸糧半長途而  
中宿架千樓而致極爛若神扶羅萬戶而窺天巍如化立

離堂早照，斂日籠光於綺寮。合殿宵深，歸雲納影於重廡。  
珉房砥室，畫栱相望。綠岫紅巖，雕櫳間出。元熊蚺螭，俯棟  
宇而危心。青鳥歸飛，仰櫺軒而隊翼。轉飛檐於秀萼，上出  
重冥。蔭反宇於迴谿，下臨無地。紅葩紫的，垂倒井而披文。  
金鎖銀鋪，接重局而炫色。儼鉤陳於漢陌，泰階非遠。設陛  
戟於煙莊，仙梯可陟。華璫壁散，掛明月於崇朝。密網珠連，  
落奔星於已曙。丹梁發秀彩，沓虹文皓壁。凝鮮光，涵蜃氣。  
銅龍對雷，接飛泉而瀑流。鐵鳳連薨，遡還飈而佇立。雖南  
纏統序，北室開榮。凜勁氣於叢楹，起淒風於洞穴。駿鳥失

纒出澗戶而無光金兔低輪下山扉而變色陰庭阻夏祝  
融無竊據之因邃屋乘春顓頊定忘歸之策飛廉扣響超  
北闕而神寒屏翳收津謁南端而股戰蒼蒼八桂白露爲  
霜落落千松元陰昧景金人列陛來危砌而思裴玉女窺  
窗伏曾巒而請纘陽秋代駕不凋仙圃之華天地爲鑪未  
解幽陵之凍至若氣清乾步景霽山維樓翠靄於崇榮列  
朱霞於複榭瓊枝累道移綴文槐碧樹周阿光瑤鏤檻靜  
簾帷而洞啟穆羽相和肅坻堦而天臨纖塵不動宸儀有  
晬蓬萊與城闕俱榮羣后多歡蘿薜共簪裾合賞巖花落



砌綴龍泉而成文嶂葉交軒拂鸞旗而追影鑪峯轉靄香  
傳玉几之風石瀨鳴湍響入銅壺之水乃有陵陽駕鶴奉  
丹墀而稱臣子晉吟鸞下青蒲而謁帝箕精失曜傳說恭  
命於東廂昴宿低芒庭堅奉職於西序三臺九署雲端極  
目霓裳鳳髻闕下相尋張良卧疾攀赤松而有地綺季來  
朝歌紫芝而忘返若夫功成旰食道濟宵衣漢宮追聽覽  
之餘堯殿得巡來之隙霞登月憩光睿幸於彤闈玉振金  
聲藻宸章於翠掖洛陽才子承閒盡宣室之談蜀郡詞人  
還奏動甘泉之賦復有軒庭十四出桂闔而乘茵永巷三

千望椒塗而奉幣翊鸞臺之廣晏扈駕砌之仙遊羅綺芳  
兮四面春環珮鳴令九重暮風闋夕敞攜少女於歌筵月  
幌宵隴下姮娥於舞席元房竢宴雲姬辭豹尾之歡紺幄  
承顏星媛入魚鱗之戲若乃屯營櫛比對閭道而斜趨解  
寺棋分混文昌而外屬周朝瑞鸞聲參叶律之宮陳寶鳴  
雞響雜司晨之序名都廣會閭閻萬室帝籙仙垣亭皋千  
里山村野塾家連菌草之園谷飲川居戶有桃符之水故  
夫恩加草樹囿原澤而無私道被翔行苑山川而不禁每  
至旻天戒序高風嘯律虞官獻秋獮之儀司馬奉梁騶之

典將軍布卒畧元灞而東馳都尉關營繞黃山而北睇於  
是逢蒙列階蚩尤並轂材官發射期門走仞杖元麾而直  
指鶚視千羣奮朱鬣而橫行龍驤萬計層旗廣旆出宇宙  
而三驅疊鼓鳴鐘運雷霆而一呼前旌逐日夸父斷洪河  
之流後騎超山共伯挾崑崙之柱近陵吐燄緝奔電於長  
鋒灌莽生塵隕飛霜於勁鏃合戈鋌而照地猛兕知窮振  
罟網而籠天騰龍失據崩林磔石毛羣無挺險之資蔭澤  
風山羽族落垂雲之影長圍躡蹠得駿馬於秦垌大輅徬  
猗載飛熊於渭浦然後還師振旅考事陳功皮軒按節牙

璋復路祝餘生於大野誓廣校於長陬班腥於截辟之墟  
省蜡於長楊之館命奔烽而舉醕火照甘泉總輕騎而行  
庖雲驚上路聲兼萬籥歌鐘空廣樂之庭禮被三雍玉帛  
盡塗山之會龍胎鳳卵入禹膳而調芳石乳瓊漿委堯樽  
而湛色恩霑下帛宴液仙宮雖大夫思濯鷁之歡而天子  
可迴鸞之奏然後拜釐清廟考德齋宮用元功而不有宅  
太虛而無迹勲崇易簡規萬祀而化黃金道貫幽明徵百  
靈而饗丹甌得元珠於舜海尚警冰危朗天鏡於堯儀猶  
勤日昃虔恭上帝東朝懸待諫之旌清問下人南面聽登

聞之鼓則有郊童候蹕敢讓天師野老排闥唯歌帝力風  
行比屋忠臣收折檻之謀化溢康衢良使息埋輪之請設  
神規而動俗庶績其凝握元符而發祉殊方合應華胥已  
泰濟羣生於不死之庭閭闔可觀致仙厯於無窮之境蕩  
蕩乎發育萬物而顯諸仁洋洋乎包舉六氣而藏諸用均  
兩儀而得一恥三皇而不四者矣臣勃東臯賤節北阜幽  
姿常叨召見之恩驟玷明敷之列書生謁相望闕推輪下  
客遊梁榮參賜帛終童立志空投函谷之繻馬令同時未  
給尚書之筆雖元機妙鍵已寂兆於忘言而詠德陳功請

追聲於匪頌其詞曰

九門浩蕩三山超忽帝坐金房仙成玉闕浮丹麗紫棲霞

冠月眞匠難徵虛談易越

其一

旋窺鳳紀極睇龍墳曾巢化

沒上棟爻分茅宮蔽雨松殿來雲猶迷匪陋尚闕斯文

其二

道倫明一風遷繼五禮讚三宮詩歌百堵黃圖未洽紫庭

無輔局促墉垣逡巡度矩

其三

盛衰環襲冲盈舛驚璿宇夏

闕瑤局殷樹奢窮地絡毒流天步相日遄奔尋雲速仆

其四

災延六國運逼三川分雄競侈禮僭圖全飛薨月徑列廡

霞阡乾谿敗楚碣石亾燕

其五

阿房秦構文軒五里建章漢

立仙闥萬祀詭代齊徑違天縱已望夷有釁甘泉不祀

其六

宛郊嗣錄譙鄉警衆蜀跨梁岷吳吞楚夢相宜栽軌崇楹

其七

累棟雲闕同華泉臺罕共晉圖終否胡風肆極霧黷丹

其八

園塵埋紫域皇階不守帝庭無色帳殿相臨璫牆間飾

南承有宋北洎亾隋功慙戶牖守在城池樓船水覘車陣

其九

山窺吳庭再毀代鼎三移火德初融江陽喪旅奄收淮

船遂朝吳渚象錯驕秦龍舟壞楚雄圖乃溢傾宮不處

其十

海岳呈華風雷寫慶翦諸戎首光我靈命紫氣雲蒸黃星

月映輔商爲業遵唐啟聖

其十一

景闕丹繩祥抽翠籙格天

垂範模神驚躅朱極重光黃離繼旭道清金鏡時和玉燭

其十 徵規鳳闔毓訓鸞闈桐宮宿列桂邸霞飛台精變道

岳耀裁幾朝盈振鷺境比馴翬其十 武韜弓矢文經步驟

爽鳩議獄龍夔掌奏玉帛華夷提封宇宙譯書歲欸祥圖

月湊其十 帝功得一乾元用九鏤玉天齊塗金社首神京

四邑明堂八牖變而可大爲而不有其十 層宮望幸堯封

佇悅伺隙披圖乘時徙轍赤騮俟駕蒼虬按節月車宵移

星闌曉列其十 方神護野岳將清塗迴麾嶠路逗蹕山樞

千靈電驚萬辟風趨鈞臺有問峒岫無虞其十 五城分秀



雙巒抗影畫拱彌峯雕甍亘嶺煙闥夜謐雲房晝靜竹殿

棲寒松軒祕景

其十

紫庭晨御彤闈早闢天子凝旒辟公

奉璧薜蘿齊致簪裾混迹仙鶴隨輪靈鳧墜舄

其十

風局

濬敞震廊藻邃玉網星開金鋪月墜山樓獸矯雲臺鳥次

複嶂披丹迴流轉翠

其二十

仇夷聖宅姑射神心樂翔丹鳳

使引青禽羲壇葉暗禹洞花深沼分瑤水苑跨珠林

其二十一

順時宣節分戎講將星騎朝飛雲羅夕張寶雞獲祉非熊

入貺駕掩岐蒐禮高秦望

其二十二

鄴庭未遠塗山有戮襄野

迷軒清都宥穆罕夷乾步徒豐帝屋光總大猷允歸天祿

欽定全唐文

卷一百七十八

王勃

三

其二  
十三 合宮垂訓靈臺韻雅功映寰中頌流天下皇圖已泰

鴻筆難假帝有力焉惡非能者

其二  
十四

欽定全唐文卷一百七十九目錄

王勃 三

上拜南郊頌表

上九成宮頌表

爲原州趙長史請爲亡父度人表

上百里昌言疏

上劉右相書

上絳州上官司馬書

與契苾將軍書

爲人與蜀城父老書

爲人與蜀城父老第二書

欽定全唐文卷一百七十九

王勃 三

上拜南郊頌表

臣伏見總章元年十二月四日詔旣清東寇將覲南岳甫  
資元勲旋窺大典伏惟皇帝陛下黼藻神器銜策睿圖用  
天老之前機戮防風之後至爲而不恃懸寶位於中宸卑  
以自居託靈符於上帝禮凝蒼璧瑞溢元珪紫旻降祐黃  
祇叶矩微臣學不照古才不曠時窺宇宙之神功覩郊禋  
之盛節時非苟遇懷雅頌而知歸道不虛行想謳歌而有

志豈與夫周傳考室裁稱棟宇之規漢奏甘泉未息嬉遊  
之諷比興衰於前代較馳驟於同衢而已謹憑天則輒貢  
拜南郊頌十章文不足奇意有遺美臣誠惶誠恐謹言

上九成宮頌表

臣某言臣聞帝機無朕道洽則時邕靈化不言功成則頌  
顯伏惟陛下體元纂極模神建隧棟梁三氣庭階六合松  
軒夜警杳冥姑射之心茅殿晨凝寥廓峒山之駕臣霑風  
太上庇影華胥仰衢室而無階候襄城而有地雖望卑平  
叔空勤景福之詞而文謝子雲願竭甘泉之思謹憑天造

輒貢九成宮頌二十四章攀紫墀而絕望叫丹闕而累息  
臣誠惶誠恐死罪死罪謹言

爲原州趙長史請爲亾父度人表

臣某言臣聞奉忠履義帝業所資昭德報功王風是切臣  
亾父故臣使持節都督豐州諸軍事豐州刺史上柱國南  
康郡王士達往因隋季預奉皇初于時九洛未清雙嶠尚  
梗江淮海岳王公數十亾父身羈僞鄭寵極戎庭掃千載  
之風雲擁三河之士馬情思奉順義不圖生綿越寇場密  
歸誠歟登太行而耀甲則建德離心出函谷而揚麾則王

充破膽天書屢降手勅仍存洎乎九服乂安四方無事謀  
臣出鎮猛將臨邊西窮赤水之源東究青邱之境橫戈北  
塞盡沙漠之風塵授鉞南荒被牂牁之矢石義形夷險迹  
遍疆場分閭淹榮懸車遂禮雖死於牖下實懷天子之恩  
力盡方隅無愧忠臣之節今者歸藏有日先遠戒期陛下  
德被遊魂惠流枯骨高班厚祿已極於生前列鼓鳴簫復  
光於身後誠非毀滅所能投報但臣霜露之感瞻彼岸而  
神銷烏鳥之誠俯寒泉而思咽希開淨福庶補窮埏伏惟  
陛下恢不次之恩錄無涯之請使獲從朝例賜許度人濟



沈識於昏塗拯亾靈於燬宅則陛下乾坤之施旣不隔於  
幽明微臣螻蟻之心豈忘情於家國是所圖也非敢望也  
輕黷冕旒若墜氷谷

上百里昌言疏

勃言鄉人奉五月一日誨子弟各陳百里之術宣於政者  
承命惶灼伏增悲悚勃聞古人有言明君不能畜無用之  
臣慈父不能愛無用之子何則以其無益於國而累於家  
也嗚呼如勃尚何言哉辱親可謂深矣誠宜灰身粉骨以  
謝君父復何面目以談天下之事哉所以遲迴忍恥而已

者徒以虛死不如立節苟殞不如成名悔過儻存於已爲仁不假於物是以孟明不屑三奔之誚而罷匡秦之心馮異不恥一敗之失而摧輔漢之氣故其志卒行也其功卒就也此言雖小可以喻大此勃所以懷既往而不咎指將來而駿奔割萬恨於生涯進一簣於平地者今大人上延國譴遠宰邊邑出三江而浮五湖越東甌而度南海嗟乎此皆勃之罪也無所逃於天地之間矣然勃嘗聞之大易曰人之所助者信也天之所助者順也是以君子不以否屈而易方故屈而終秦忠臣不以困窮而喪志故窮而必

亭今交趾雖遠還珠者嘗用之矣書不云乎弗慮胡獲弗  
爲胡成不勝憤激之至謹上百里昌言一部列爲十八篇  
分爲上下卷庶竭私款少裨公政追思罪戾若投冰谷謹  
奉言疏不備勃再拜

上劉右相書

蓋聞聖人以四海爲家英宰與千齡合契用能不行而至  
春霆仗天地之威以息相吹時雨鬱山川之兆故有元蛟  
晚集憑鶴鼎而先鳴蒼兕晨驚運龍韜而首出並能風騰  
霧躍指麾成烈士之功螭屈虬奔談笑坐羣卿之右未如

越蒼海棄行間排紫微謁天子於是遭不諱之主擁非常之位龍章鳳黻照其前鏘金鳴玉疊其後三靈叶贊超然奉天下之圖四海承平高步取寰中之託君侯之富貴足矣聖朝之付遇深矣故知陽侯息浪長鯨卧橫海之鱗風伯停機大鵬鍛垂天之翼及其投形巨壑觸丹浦而雷奔假勢靈颺指青霄而電擊神氣洋洋謂鱗翮使之然也殊不知兩儀超忽動止繫於無垠萬化糾紛舒卷存乎非我是以陳平昔之智士也俯同降卒百里奚曩之達人也親爲餓隸當其背強敵轉康衢雄慮耿於風雲危途迫於朝

夕豈自期榮稱相府西藩開虎據之圖寵冠齋壇東向舉  
熊飛之策顧盼可以蕩川岳咄嗟可以降雷雨遂令用與  
不用是非於楚漢之間知與不知得失於虞秦之際故曰  
死生有數審窮達者繫於天材運相符決行藏者定於已  
君侯足下可不謂然乎借如勃者眇小之一書生耳曾無  
擊鐘鼎食之榮非有南鄰北閤之援山野悖其心跡煙霧  
養其神爽未嘗降身摧氣逡巡於列相之門竊譽千時匍  
匐於羣公之室所以慷慨於君侯者有氣存乎心耳實以  
四海兄弟齊遠契於蕭韓千載風雲託神知於管鮑不然

則荷裳桂楫拂衣於東海之東茵閣松楹高枕於北山之  
北焉復區區屑屑踐名利之門哉至尊以搖河徙岳之威  
當立地開天之運聖人有作羣材畢舉星辰入仕揖讓朱  
鳥之門風雨稱臣奔走蒼龍之闕方欲停旒金室引成康  
於已往闕續瑤林復堯舜於茲日可謂明明穆穆盡天子  
之容貌矣抑嘗聞之丹山九仞煙峰非數簣之功紫極千  
門雲臺俟萬楹之力故天下至曠神器不可獨專天道無  
私元勲有待而立書曰元首明哉股肱良哉好問則裕自  
用則小况掌萬國之權受一人之寵動見臧否言知利害

君侯足下何時易耶雖國有大命不資童子之言而恭此  
小心敢進狂夫之說伏見遼陽未靖大軍頻進有識寒心  
羣黎破膽昔明王之制國也自近而及遠先仁而後罰徵  
實則效存徇名則功淺是以農疏十野僅踰重石之鄉禹  
截九州不敘流沙之境豈才不及而智有遺哉將以辨離  
方而存正功也雖至人無外甲兵曜天子之威王事有征  
金鼓發將軍之氣而長城在界秦漢所以失全昌巨海橫  
流天地所以限殊俗關土數千里無益神封勒兵十八萬  
空疲帝卒驚烽走傳駭秦洛之吐飛芻輓粟竭淮海之費

於是乘奸放命者出繩纆以生威因公挾私者入閭閻而競法雖一物失所太階延肝食之憂而百戰方雄中國鮮終年之樂圖得而不圖失知利而不知害移手足之病成心腹之疾征稅屈於東西威信蹇於表裏語曰勝之不武不勝爲辱天下之責四面至矣誠可遠疑高策上薦忠言決人事於去就合天情於終始遂令回麾轉檄背青邱而驚列障分亭巡蒼波而守昔者齊侯以力方城爲楚國之辭虞帝崇文苗人失洞庭之險况乎仗德綏亂以直乘邪明逆順之端聳華夷之望雖復舳艫沸海旌旗觸天鐵山



四面金城千里亦不能爲敵人計矣此君侯之未諭一也  
蓋聞星迴日運御洪荒者貞夫一電照風行制寥廓者歸  
乎靜易曰復其見天地之心乎語曰動之斯和綏之斯來  
是知源潔則流清形端則影直大道起而仁義息神化周  
而市獄定雖復體元立教膏災耀知遠之書順時宰物宥  
罪發精微之典而况澆風易漸淳化難歸孔明耿介於當  
朝子輿殷勤於易簣蓋有由也伏見邊凶尚梗殊恩屢發  
凶命山澤者日月相趨朝脫桎梏夕還囹圄姦徒抱袂因  
時立僥倖之謀頑夫頓足中路紆吁嗟之慘皆由寬勝於

猛人迷所習勸沮不彰廉恥相冒亦有公卿失職恥受珪符之任郎官有釁俯捨銅墨之榮又焉可以宏長風流抑揚衆務者也且夫朽索充羈不收奔馬之逸輕緝振網或隨吞舟之勢况非常之化方洽於齊人無妄之恩乃及於羣小將恐匡衡管仲復靈詔於下泉矣古之善爲國者不然信賞而必罰道德而齊禮澤配風雨而無曲惠威振雷霆而絕私戮交書登幣伏慈厚之師投金散璧樹仁明之長故雖開衢室蓋明堂亦將四三皇而六五帝矣此君侯之未諭二也蓋易曰天地之大德曰生聖人之大寶曰位

何以守位曰仁何以聚人曰財是知發揮地利農桑啟其  
業振蕩天功泉貝流其用伏覩前制屢擾事非畫一廛市  
蕭然人情怪動夫煩簡並用未盡交易之宜輕重齊行適  
啟兼并之路於是連關掩關者閉肆而乘其屈布衣韋帶  
者闔門而受其困五方競爽務淺術以相雄百郡爭勝驅  
末技而成弊田夫織婦衣食鮮終朝之給巨駟洪商輿馬  
挾封君之勢蓋有由來矣故曰國儲闕於九載則公上無  
所給家廩乏於三年則妻子非其有夫陰陽覆逆天地之  
常數百六運窮湯堯所不免一旦洪泉決地大旱焦山風

雨於一歲之間霜雹於數州之境繁運廣役首尾於中外  
沓稅增徭日夕於都鄙變陰陽者將何以處之一夫竊議  
公之盛德虧矣愚謂嚴程峻法絕輕陋之貨則奸鎔之源  
塞矣沿風正典重耕耘之務則邪贏之計沮矣然後遠宏  
教旨大變流俗法立有犯而必施令出唯行而不返違公  
竊鑄者具五刑之戮因時力田者懸一命之賞不然則賈  
生晁錯復流涕而言矣此君侯之未諭三也嵩衡不拒細  
壤故能崇其峻江海不讓纖流所以存其廣是以星臺曉  
闕上台忘吐握之勞月殿宵興中宇軫山林之慕知夫御

天下者必待人也詩曰濟濟多士文王以寧未見君子憂  
心如醉伏見皇明遠燭帝采遐宣張樂岱郊騰勲社首徵  
廉察孝瑤壇虛不次之階署行議年璿檢動非常之詔天  
下可謂幸甚矣於是友月朋霞之客背青皋而至馮唐顏  
駟之才排紫閣而集夫豈知終始異數涇渭同流蘿薜失  
圖簪纓解體惜哉羣英霧散名侯招蔽善之嫌天下雷同  
君子鮮長鳴之地而欲招絕足致真龍難矣此君侯之未  
諭四也易曰拔茅連茹以其彙征吉豈非順物不若招類  
報國不如進賢陽事昇而雨露歸陰駕凝而風霜厲莫不

觀時有記撫氣相求窮則獨善其私達則兼善天下而利  
已疵物者以自任爲身謀知進忘退者謂專榮而得計豈  
知夫尺波易謝寸晷難留陵谷好遷乾坤忌滿君侯足下  
出納王命升降天衢激揚鳳宸之前趨步麟臺之上亦復  
知天下有遺俊乎夫心之精微口不能言也言之微妙書  
不能文也伏願闢東閣開北堂待之以上賓期之以國士  
使得披肝膽布腹心大論古今之利害高談帝王之綱紀  
然後鷹揚豹變出蓬戶而拜青墀附景搏風捨臺衣而見  
絳闕幸甚斯不爲難矣庶幾乎麇卵不棄終感元枵之精

駿骨時收或致飛黃之錫書生王勃死罪死罪再拜

上絳州上官司馬書

月日龍門百姓某謹再拜奉書於司馬上官公足下蓋聞  
靈化出於窈冥帝圖寄於寥廓聖人生而萬物覩太階平  
而四國會故曰有非常之后者必有非常之臣有非常之  
臣者必有非常之績至今雷奔雨嘯風旋電轉拾青紫於  
俯仰取公卿於朝夕雲臺迫漢南宮列元宰之圖霜戟羅  
門北闕據名臣之第嘗見之矣至若時非我與雄畧頓於  
窮途道不吾行高材屈於卑勢孔宣父之英達位未列於

陪臣管公明之傑秀名僅終於郡屬有時無主賈生獻流涕之書有志無時孟子養浩然之氣則亦有焉豈非妙造無端盛衰止乎其域神期有待動靜牽乎所遇向使太公失於周伯則旗亭之屠父韓信屈於蕭何則轅門之餓隸又焉得鷹揚豹變吐納風雲者哉故曰知與不知用與不用觀夫得失之際亦窮達之有數乎其有邀時譽忘廉恥徇苟得設向背於朝廷立縱橫於勢利舉三寸之舌屈辱豪門奉咫尺之書逡巡下席皆自謂材足以動俗智足以濟時鐘鼎輝其顧盼冠蓋生其藉甚豈知夫四海君子攘



袂而恥之乎五尺微童所以固窮而不爲也此蓋莊周有  
言所以得意而忘象得象而忘言語曰談何容易稱書  
不盡言知談之不易而欲言之盡以是思之良可知矣下  
官者康衢之賤耳嘗聞闕里之言頗挂平輿之目豈不知  
塵形俗狀游水鏡而多慙抱鼓援鼙過雷門而自失而欲  
刻鵠飾鳧唐突扁鑰者耶徒以登山泛海庶測高深執炬  
傳螢希增日月三奔九合下官聞管仲之風千載一時君  
侯受鮑卿之託是以敢陳其逕庭不然則秋風明月西江  
留獨往之因桂嶠松巖南山有不羣之地矧區區者而重

高明之閭闕哉君侯極天分構振瓊樹而韜霞帶地疏源  
握珠胎而冠月鱗軒羽殿瑤臺降卿相之榮鵲印蟬簪金  
社發公侯之始青皋獨咲望鴻漸而翻霞丹穴高鳴對鵷  
池而矯霧嚴助以賢良待詔未厭承明汲黯以方正拾遺  
終榮卧理藩維克振旣參來暮之歌邦國不空自有康沂  
之相加以雄材廣度散琬玉於胃懷逸氣邁文運風霜於  
掌握迫青霄而構舍煙霞之涯涘莫尋振滄渤以流謙江  
漢之波瀾未測耀靈珪於趙席垂棘知歸辯羣籟於莊軒  
懸匏自託賓階夕敞清河銷驥繫之虞虛榻晨披元禮得

龍驅之地方當翊贊宸極羽儀台屏豈徒偃仰州縣勞事  
藩庭而已哉借如僕者言不滿於鄉黨聲不出於堂閭東  
海取樂於簞瓢南山異志於文史餐花佩葉入蘭室而談  
元挹露攀霞坐松扃而嘯逸揚子雲之澹泊心竊慕之嵇  
叔夜之逍遙真其好也未嘗露才揚已飾小智以驚愚假  
勢憑時託中人而樹迹遍遊天下寒心於將相之門獨守  
太元側身於名利之境嘗謂奉琴卮於北牖詠詩禮於南  
陔坐商洛而折雲英臨江湖而採煙液生願畢矣而屬鸞  
扃停逸頻虛不次之階鶴板徵賢累發非常之詔天下有

道吾豈匏瓜承達人一顧之榮辱公車再辟之禮平津侯  
之博物終屈奉常賈大夫之才名猶逢絳灌况庸者而可  
免於此乎君侯要津先據圖海盛於當時下官覆篲方勤  
爲山始於今日雖陵深谷變終非入室之賓而畫詠宵吟  
敢預升堂之列夫以幽明不測尺標見天下之心巨細相  
傾寸管合義舒之度豈非道存斯貴理在必亨霸畧近發  
於興歌皇圖不隔於芻議故有榮枯絕等奉推轂而欣然  
年勢不侔受分庭而罔愧風規可接惟君侯體之今古未  
殊則下官願矣常恨霜松列澗萬尋無罩月之期露草滋

山寸莖有梢雲之望斯則聲實困於兼濟才位難於俱立  
况乎地勢不足以誇俗容貌不足以動人遑遑數澤安足  
以奉高明之咳唾也所冀蠅階賤質附雲足而追飈蚋序  
輕姿託霜毛而絕海委名勵已蛟鱗申獨斷之能偶跡當  
仁驪珠鮮闇投之懼天衢可望指鵬程而三休巨壑難遊  
伏龍門而一息勃死罪死罪

與契苾將軍書

昊天不忱哲人終否畢公逝矣傷如之何敬想情則懿親  
義惟良執非夫人之爲慟其誰爲慟乎僕與此公早投交

契夷險之際終始如一常思並建忠孝之績共申家國之  
讐壯志不就古人所悲何圖一旦長訣嗚乎哀哉管仲不  
存叔牙空在子皮已喪子產何依興言追昔良增痛悼適  
得韋四郎書具承大郎雅意知欲以此公碑誌託之下走  
夫撫今懷昔理寄斯文旌德敘功事屬知已是以子期幽  
思感叔夜之形言伯喈雄藻待林宗而無愧下走雖不敏  
幸託深期此而不爲誰當爲者但恐位卑先達才非拔萃  
虛承厚睠不副高聞謹遣舍弟勛往面取進止臨書啜泣  
慘惶不次

爲人與蜀城父老書

蓋聞天地作極不能遷否泰之期川岳薦靈不能改窮通之數豈非聖賢同業存乎我者所謂才榮辱異流牽乎彼者所謂命是以龍驤鳳峙伊周成翊贊之功含糗羹藜顏冉困棲遲之病或先號而後笑或始吉而終凶事不可量功未必定則知洪濤未接長鯨多陸死之憂層風未翔大鵬有雲傾之勢池鰭井鮒亦將鼓鱗而輕之田鳩野鷄亦將騫翮而侮之及其衡溟渤接扶搖吹波則江漢倒流騰氣則虹霓掩彩摩赤岸負蒼天然後知其力焉吁韓信之

無津也昌亭之一餓夫耳馬卿之失路也臨邛之一食客耳武不足以服衆文不足以動時長劍屈於無知洪筆淪於不用洎乎雄圖躡運至尊納背水之謀麗藻昇朝天子賞凌雲之作威加海岳聲振廊廟彼淮陰之俠少成都之遺老也又焉能知遠近哉是以鑒物於肇不於成賞士於窮不於達是知卞和之得玉也精存於岸谷之間張華之得劍也氣發於星辰之際夫豈琢磨成器然後知其寶割斷爲能然後知其用哉仰惟鄉耆等並玉山高族金隄勝侶列子弟於千城耀衣冠於百代或以風雲去國公孫躍



馬之年鐘鼎從王諸葛攀龍之日門庭相接雕甍將綺棟  
連陳機杼相和鳳鑷將虬梭交響金漿玉饌食客三千綠  
幘青裳家僮數百冲襟渺識人多江漢之靈麗藻華文代  
有雲淵之氣北齋開敞南館虛閒詩酒同歸琴書合契忘  
機得意恥嵇阮之交疎虛席延賓恨原嘗之客少實煙霞  
之藪澤風月之津梁者乎劉仲文之遠識不以乾沒詣梁  
城閔仲叔之高風不以口腹累安邑雖其已沒生氣猶存  
况乎屬宇宙之明當天下之泰不能俯拾青紫高視搢紳  
攀北極而謁帝王入南宮而取卿相脅肩側足求哀鍾釜

之間低首俯眉取濟斗升之末嗟乎誠下官所以仰天漢而鬱拂臨江山而慷慨者也但時可以未遇道可以未行志願可以未成功業可以未就古之才足以輔王業躡跡屠釣之門功可以濟巨川藏身版築之下百里奚之負販陳湯之丐貸而況於庸者哉此僕所以駿奔於顧盼之餘自致於恩光之末也且夫精誠所感尚動神明意氣相交豈慙車馬倘能投心季子遙存素紵之恩援手應侯先立綈袍之贈豈人之情也能無報乎方今白藏紹序朱律謝期天高而林野疎候肅而江山靜輕蟬送夏驚晚吹於風

園旅鴈乘秋動宵吟於露渚絲續成於南畝稭黍被於東  
阡時計有儲願履多福下官薄游綿載飄寓淹時歡躋相  
仍憂虞自積陟梁鴻之峻岳何暇長謠臨阮籍之長途惟  
知慟哭庶憑調給以濟飄危輕訴短懷佇流嘉托

爲人與蜀城父老第二書

蜀都廣鎮岷墟奧壤山分玉宇水向金陵景既有期英靈  
間出榮問休暢幸甚幸甚夫神有可迫淥波驚七柱之音  
道有可符元霜扣九鐘之節豈道窮精秘妙聽察於無聲  
理實杳冥元應通於不測波流柱響波無入柱之因霜落

鐘鳴霜非扣鐘之具矣况乎言忘意得臭味相求目擊道  
在神明已接鄭僑之逢吳札無謂殊方阮籍之對嵇康自  
然同氣僕雖不敏嘗從事於斯矣嘗謂薰蕕不共器梟鸞  
不比翼是以類乎方者接風雲於千里乖乎類者起山川  
於一面抑嘗聞之士之生也其跡可擯而道不可藏其身  
可辱而志不可奪其有拂衣投臂遁形滄海之隅裂裳裹  
足獨立高山之頂量腹而食度身而衣以鐘鼎爲芻豢以  
衣冠爲縲紲方欲策鸞鳳而撫雲英鞭虹霓而採煙液其  
次排玉闕指金門成賈誼之謨樹終軍之策因機入務懷

素將相之門沐露沾霜擁簪公侯之室然則拾青紫於旦  
暮取功名於俄頃演文物而動寰中騰聲名而振天下若  
下官者可謂慙二途矣而斂手長揖強顏高視低心於蹇  
躓之辰忍恥於恓惶之日者哉渭濱留釣鷹揚之業未萌  
淄源滯牧鴻漸之資蓋寡及其攀穹運接靈期乘雲雷而  
清八極和陰陽而調萬品則知冥機所運吉凶於倏忽之  
間元命所移飛伏於斯須之際以日月自至聊復爾耳方  
今炎飈謝節爽候開辰風高而宇宙清霜下而亭郊肅歸  
雲止鴈流曙響於東津落照開鴻寫晴規於北岸螢疎夕

砌蟬促朝林感序緣情登高寄賞僕一違秦隴再革炎涼  
戒征軸而無因指歸途而有倦故鄉超曠層山重複吳宮  
尚遠頻驚去燕之心楚峽猶賒已下聞猿之淚徒以風猷  
未隔道義相存幸承知己之心稍緩他鄉之思昔者虞公  
再見懸光白璧之前季布一言猶定黃金之諾況乎交已  
成於杵臼道已茂於金蘭希照窮途遠流嘉貺若使恩裁  
口腹空留安邑之賓惠闕始終取恨昌亭之客